

Ո Ր Ո Շ ՈՒ Մ

Ճանապարհային ոստիկանության վարչական տույժ նշանակելու մասին 11.01.2024թ. թիվ 2417734193 որոշումը բեկանելու և վարչական իրավախախտման վերաբերյալ գործի վարույթը կարճելու մասին

<<07>> 02 2024թ. 24-5- 1136

ք.Երևան

Ճանապարհային ոստիկանության պետ, ոստիկանության գնդապետ Ն.Սարգսյանս, վերանայելով Նարեկ Զանինյանի ՄԴ/6848-24 դիմումի քննարկման արդյունքում ստեղծված նյութերը՝

Պ Ա Ր Զ Ե Ց Ի

Քաղաքացի Նարեկ Զանինյանը (**ծանուցման հասցե՝ քաղաք Երևան, Կենտրոն վարչական շրջան, Բրյուսովի փողոց, 28 շենք, 22 բնակարան**) դիմումով խնդրել է բեկանել Ճանապարհային ոստիկանության վարչական տույժ նշանակելու մասին թիվ 2417734193 որոշումը՝ նշելով, որ իրավախախտումը կատարել է հիվանդին հիվանդանոց տեղափոխելիս: Դիմումին կից ներկայացրել է <<Նաիրի>> բժշկական կենտրոնի կողմից տրված մեծահասակների ամբուլատոր բժշկական քարտից քաղվածքը:

Դիմումի քննարկման արդյունքում պարզվել է, որ Ճանապարհային ոստիկանության վարչական տույժ նշանակելու մասին թիվ 2417734193 որոշումը ենթակա է բեկանման հետևյալ պատճառաբանությամբ.

<<Վարչարարության հիմունքների և վարչական վարույթի մասին>> օրենքի 37-րդ հոդվածի 1-ին մասի համաձայն՝ վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

<<Տեսանկարահանող կամ լուսանկարահանող սարքերով հայտնաբերված ճանապարհային երթևեկության կանոնների խախտումների վերաբերյալ գործերով իրականացվող վարչական վարույթի առանձնահատկությունների մասին>> օրենքի 3-րդ հոդվածի 1-ին մասի համաձայն՝ վարչական վարույթի իրավախախտման հատկանիշների պարզման փուլում իրավախախտումը հիմնավորող ապացույցը իրավախախտումն ամրագրած **տեսանյութն է կամ լուսանկարը**, որը պարունակում է նաև տեխնիկական միջոցով արձանագրված տվյալները: Ըստ նույն հոդվածի 2-րդ մասի՝ որպես իրավախախտումը հիմնավորող ապացույց վարչական կամ դատական կարգով բողոքարկման վարույթում կարող են օգտագործվել Վարչական իրավախախտումների վերաբերյալ Հայաստանի Հանրապետության օրենսգրքի 251-րդ հոդվածով նախատեսված ապացույցները:

Վարչական իրավախախտումների վերաբերյալ ՀՀ օրենսգրքի 251-րդ հոդվածի 1-ին մասի համաձայն՝ վարչական իրավախախտման վերաբերյալ գործի ապացույցներ են համարվում ցանկացած այն փաստական տվյալները, որոնց հիման վրա օրենքով սահմանված կարգով մարմինները (պաշտոնատար անձինք) հաստատում են վարչական իրավախախտման առկայությունը կամ բացակայությունը, տվյալ անձի մեղավորությունը այն կատարելու մեջ և գործի ճիշտ լուծման համար նշանակություն ունեցող այլ հանգամանքներ: Ըստ նույն հոդվածի 2-րդ մասի՝ այդ տվյալները հաստատվում են հետևյալ միջոցներով՝ վարչական իրավախախտման վերաբերյալ արձանագրությամբ, վարչական պատասխանատվության ենթարկվող անձի բացատրություններով, տուժողի, վկաների ցուցմունքներով, փորձագետի եզրակացությամբ, իրեղեն ապացույցներով, իրեր և փաստաթղթեր վերցնելու վերաբերյալ արձանագրությամբ, ինչպես նաև այլ փաստաթղթերով:

<<Նաիրի>> բժշկական կենտրոնի կողմից 26.01.2024թ. տրված թիվ 28 տեղեկանքի, հիվանդանոցային պայմաններում արտահիվանդանոցային բժշկական օգնության և սպասարկման թիվ A20230109643 քարտի և ընդունարանի գրանցամատյանի համապատասխան թերթերի լուսապատճենի համաձայն՝ Գագիկ Կարենի Ավետիսյանը (ծնվ.՝ 20.11.2002թ.) 31.12.2023թ. ժամը՝ 03:07-ին <<KIA>> մակնիշի 70GG330 հաշվառման համարանիշի ավտոմոբիլով ուղեկցորդի ուղեկցությամբ դիմել է ԲԿ <<Զարկերակային հիպերտենզիա 2-րդ աստիճան>> ախտորոշմամբ, գանգատվել է սուր գլխացավից, զարկերակային ճնշումից՝ մինչև 200/110մմ.սս:

Վարչական իրավախախտումների վերաբերյալ ՀՀ օրենսգրքի 17-րդ հոդվածով վարչական պատասխանատվության ենթակա չէ այն անձը, որը թեև սույն օրենսգրքով կամ վարչական իրավախախտումների համար վարչական պատասխանատվություն սահմանող այլ նորմատիվ ակտերով նախատեսված գործողություն է կատարել, սակայն գործել է ծայրահեղ անհրաժեշտության վիճակում, այսինքն՝ մի այնպիսի վտանգ վերացնելու համար, որը սպառնացել է պետական կամ հասարակական կարգին, սոցիալիստական սեփականությանը, քաղաքացիների իրավունքներին ու ազատություններին, կառավարման սահմանված կարգին, եթե այդ վտանգը տվյալ հանգամանքներում չէր կարելի վերացնել այլ միջոցներով և եթե հասցված վնասը կանխված վնասի համեմատությամբ ավելի նվազ կարևորություն ունի:

Դիմումատուն 02.02.2024թ. հրավիրվել է Ճանապարհային ոստիկանության վարչական բողոքների քննության բաժին, որտեղ գրավոր բացատրությամբ նշել է, որ 31.12.2023թ. ինքն իրեն պատկանող <<KIA>> մակնիշի 70GG330 հաշվառման համարանիշի տրանսպորտային միջոցով իր ընկերոջը՝ Գագիկ Կարենի Ավետիսյանին, ժամը՝ 00:40-50-ի սահմաններում տեղափոխել է <<Նաիրի>> բժշկական կենտրոն, ճանապարհին մի քանի անգամ կանգ առնելով: Նշել է նաև, որ Գագիկ Ավետիսյանը եղել է առողջական ծանր վիճակում, զարկերակային ճնշման բարձրացումով, գլխացավով և գիտակցության մասնակի կորստով:

Վարչական իրավախախտումների վերաբերյալ ՀՀ օրենսգրքի 252-րդ հոդվածի համաձայն՝ մարմինը (պաշտոնատար անձը) ապացույցները գնահատում է իր ներքին համոզմունքով, որը հիմնված է գործի՝ իրենց ամբողջությամբ վերցված բոլոր հանգամանքների համակողմանի, լրիվ և օբյեկտիվ հետազոտման վրա, ղեկավարվելով օրենքով և սոցիալիստական իրավագիտակցությամբ:

Այսպիսով, վարչական վարույթի ընթացքում հիմնավորվել է դիմումատուի կողմից ճանապարհային երթևեկության կանոնի խախտումը ծայրահեղ անհրաժեշտության վիճակում կատարելու հանգամանքը, ուստի վերը նշված որոշումը ենթակա է բեկանման:

Ելնելով վերոգրյալից, ղեկավարվելով Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին մասի 4-րդ կետով և 293-րդ հոդվածի 1-ին մասի 3-րդ կետով՝

Ո Ր Ո Շ Ե Ց Ի

1. Ճանապարհային ոստիկանության վարչական տույժ նշանակելու մասին 11.01.2024թ. թիվ 2417734193 որոշումը բեկանել և վարչական իրավախախտման վերաբերյալ գործի վարույթը կարճել:
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան օրենքով սահմանված կարգով և ժամկետներում:
3. Սույն որոշման օրինակն ուղարկել Նարեկ Զանինյանին:

